



SIARAN AKHBAR

110 USAHAWAN MIKRO DIBIMBING UNTUK DINAIK TARAF MELALUI PROGRAM GROWBIZ



Puan Noor Afifah binti Abdul Razak, Timbalan Ketua Setiausaha (Dasar dan Pemantauan) mewakili Ketua Setiausaha KUSKOP dan Encik Rizal bin Dato' Nainy, Ketua Pegawai Eksekutif SME Corp. Malaysia bersama peserta yang telah berjaya menamatkan penyertaan di bawah Program GrowBiz 2023/2024.

KUALA LUMPUR, 25 Julai 2024 – Seramai 110 usahawan mikro telah berjaya dibimbing untuk dinaik taraf dan meningkatkan daya saing mereka melalui penyertaan dalam Program GrowBiz. Majlis Graduasi Program GrowBiz 2023/2024 telah disempurnakan oleh YBhg. Dato' Sri Suriani binti Dato' Ahmad, Ketua Setiausaha, Kementerian Pembangunan Usahawan dan Koperasi (KUSKOP) hari ini.

GrowBiz merupakan inisiatif di bawah Program Pembangunan Perniagaan Usahawan Mikro (BizME) yang dilaksanakan oleh SME Corp. Malaysia, agensi di bawah KUSKOP. Program ini memberi bimbingan kepada usahawan dalam menaik taraf perniagaan mereka daripada perniagaan bersaiz mikro kepada kecil serta meningkatkan pengetahuan, kecekapan dan produktiviti perniagaan. Ia telah diperkenalkan pada tahun 2021/2022 dan graduan kali ini merupakan kumpulan kedua dalam pelaksanaan Program GrowBiz.

GrowBiz menggunakan pendekatan *hand holding* ke atas perusahaan mikro yang merangkumi elemen latihan, *coaching* dan pemantauan bagi membimbing perusahaan mikro meningkatkan perniagaan ke tahap seterusnya. GrowBiz 2023/2024 dilaksanakan oleh Rakan Pelaksana yang dilantik oleh SME Corp. Malaysia iaitu Entrepreneur Culture Incorporated Sdn. Bhd. (ECI) dengan sokongan Bank Simpanan Nasional (BSN), TEKUN Nasional dan Perbadanan Pembangunan Pertanian Negeri Perak (Perak SADC) sebagai Rakan Strategik.

YBhg. Dato' Sri Suriani dalam ucaptamanya menekankan tentang keperluan untuk usahawan bersikap responsif terhadap perubahan polisi dan landskap perniagaan terkini, kepentingan transformasi digital dan amalan Alam Sekitar, Sosial dan Tadbir Urus (ESG) serta pengurusan kewangan dan risiko. Selain itu usahawan juga digalakkan untuk merebut peluang pasaran eksport serta memanfaatkan program dan inisiatif yang disediakan oleh Kerajaan. Beliau menyatakan bahawa pada tahun ini, sebanyak 275 program ditawarkan oleh pelbagai Kementerian dan agensi kepada Perusahaan Mikro, Kecil dan Sederhana (PMKS) dengan peruntukan RM15.1 bilion yang akan memanfaatkan 479,758 PMKS. Ini membuktikan komitmen Kerajaan dalam menyediakan ekosistem yang kondusif untuk pembangunan PMKS, termasuklah melalui Program GrowBiz.

Dalam majlis yang sama, YBrs. Encik Rizal bin Dato' Nainy, Ketua Pegawai Eksekutif SME Corp. Malaysia telah berkongsi pencapaian dan impak Program Rintis GrowBiz 2021/2022. Menurut beliau, "Berdasarkan kajiselidik, didapati bahawa selepas enam (6) bulan tamat menyertai Program GrowBiz, kesemua 50 peserta (100%) menunjukkan peningkatan jualan sehingga ada yang berjaya mencecah 718% setahun. Selain itu, 66% peserta telah berjaya menaiktaraf perniagaan daripada mikro kepada kecil manakala 58% peserta menambah bilangan pekerja yang berjaya mewujudkan 139 pekerjaan baharu. Terdapat juga beberapa peserta yang telah menambah bilangan premis dan rakan niaga serta berjaya mengeksport produk atau perkhidmatan ke China, Brunei, Vietnam dan Filipina".

Turut hadir pada majlis berkenaan ialah YBrs. Puan Noor Afifah binti Abdul Razak, Timbalan Ketua Setiausaha (Dasar dan Pemantauan) KUSKOP, YBrs. Encik Rizal bin Dato' Nainy, Ketua Pegawai Eksekutif SME Corp. Malaysia dan YBrs. Dr. Wan Arjunawan bin Wan Halim, Ketua Pegawai Eksekutif Entrepreneur Culture Incorporated Sdn. Bhd.

Untuk maklumat lanjut mengenai Program GrowBiz, sila layari laman sesawang, www.smecorp.gov.my.

- TAMAT -

Tentang SME Corp. Malaysia

SME Corp. Malaysia merupakan Agensi Penyelaras Pusat di bawah Kementerian Pembangunan Usahawan dan Koperasi (KUSKOP) yang berperanan sebagai pusat pengumpulan dan rujukan setempat bagi maklumat dan khidmat nasihat Perusahaan Mikro, Kecil dan Sederhana (PMKS). SME Corp. Malaysia juga menyelaras program pembangunan PMKS di Malaysia, menjalankan penilaian ekonomi dan pengakreditasi PMKS, serta melaksanakan program pembangunan perniagaan dan fasilitasi akses PMKS kepada pasaran dalam dan luar negara.

Bermula pada 2 Mei 1996, SME Corp. Malaysia dahulunya dikenali sebagai Perbadanan Pembangunan Industri Kecil dan Sederhana (SMIDEC), bermatlamat membangunkan Industri Kecil dan Sederhana (IKS) Malaysia yang berkeupayaan dan berdaya tahan agar mampu berdaya saing di pasaran global. Pada tahun 2007, SMIDEC telah diberi mandat oleh Majlis Pembangunan PKS Kebangsaan yang dipengerusikan oleh YAB Perdana Menteri untuk menggubal dasar dan strategi menyeluruh bagi PKS dan memacu program PKS merentasi Kementerian dan Agensi. Sehubungan itu, SMIDEC telah dijenamakan semula secara rasmi sebagai SME Corp. Malaysia pada 2 Oktober 2009.

PERBADANAN PERUSAHAAN KECIL DAN SEDERHANA MALAYSIA (SME CORP. MALAYSIA)

Aras 6, Blok B, Platinum Sentral
Jalan Stesen Sentral 2
Kuala Lumpur Sentral
50470 Kuala Lumpur
Tel : 603-9213 0077
Faks : 603-2775 6001
E-mel : info@smecorp.gov.my
Laman sesawang: www.smecorp.gov.my

Pengarah
Bahagian Komunikasi Korporat
(U.P. : Pn. Suraini Mohamad Sulaiman)
Tel : 03-2775 6290
E-mel : suraini@smecorp.gov.my